

大清宣統新法令

第七冊

大清宣統新法令第七冊

目錄

上諭

軍機處奏 實錄館咨取摺件檔冊酌定收發章程摺

東三省總督錫良吉林巡撫陳昭常奏吉省創設行政會議處摺

湖廣總督陳夔龍湖南巡撫岑春煊奏酌裁湘省綠營將備移併汛

防摺併清單

東三省總督錫良吉林巡撫陳昭常奏籌辦吉省添改各缺情形並

遴員試署道缺摺

度支部會奏併案議覆護滇督東督奏請將鴉片煙縮期禁種摺

馬蘭鎮總兵恩霖奏恭辦奉安事宜應設內務府官員等摺

法部奏遵議科布多辦理命盜案件酌擬章程片

法部會奏核議熱河府州縣命盜詞訟案件考核文武各員功過章

程摺

度支部奏議覆農工商部會奏藝徒學堂改爲工業學堂仍請撥崇

分類

頁數

雜

官制

官制

官制

民政

官制

司法

任用

八

七

六

五

四

二

一

一

文門盜征稅項摺

資政院會奏續擬院章並將前奏各章改訂開單呈覽摺并清單

財政 憲政 一〇九

軍諮處奏酌擬軍諮處暫行章程及各項事宜摺并清單二件

官制 一六

法部奏籌辦外省省城商埠各級審判廳補訂章程辦法摺并清單

司法 一八

法部奏前設編查處仿照各部奏設局所成案辦理片

官制 二二

度支部奏遵籌崇陵全工款項摺并清單

財政 二二

農工商部會奏議覆南洋籌設勸業會及賽物免稅等摺

實業 二五

憲政編查館奏議覆考察憲政大臣于式枚奏陳諮議局章程權限摺

摺

憲政 二六

憲政編查館奏奏定章程應以官定解釋為據片

憲政 三一

河南巡撫吳重憲奏裁糧鹽道缺增設巡警勸業兩道摺

官制 三一

閩浙總督松壽奏查覆興化通判應請裁撤片

官制 三一

圖們江中韓界務條款

外交 三二

東三省交涉五案條款

外交 三三

農工商部會奏議覆御史石長信奏請製造諸工量予實職摺

任用 三三

翰林院侍讀學士惲毓鼎奏直省倉穀有名無實請飭實行儲積

任用 三三

以備凶荒摺

度支部咨各海關報告冊變通辦法札飭各關道查照文

軍諮處奏酌擬陸軍參謀章程摺并清單

又奏釐訂參謀帶式片

又奏軍官學員續選辦法片并清單

郵傳部咨札飭所屬嚴定電桿失竊處分文

步軍統領衙門奏變通疏防盜案處分摺

中日吉長鐵路借款細目合同

農工商部札各省商務總會各商與洋商定貨受貨商會概不負責

文

法部咨覆大理院盜案新章逐條解釋並通行各直省一體查照文

外務部咨粵督覆核中越會防章程文

法部頒訂處置配犯新章

附內城巡警總廳擬定各項規則

附內外城巡警廳戒煙局章程

附內外城巡警廳戒煙局管理規則

民政 三五

財政 三六

軍政 三七

軍政 三七

軍政 三八

交通 三九

任用 四〇

外交 四〇

實業 四三

司法 四三

外交 四五

司法 四五

民政 四六

民政 四九

民政 五〇

郵傳部鐵路總局札各路局設立工匠夜學所文

交通

五四

大清宣統新法令第七冊

上諭

上諭資政院奏續擬院章並將前奏各章改訂開單呈覽一摺朕詳加披覽該院自職掌以下八章與現定諮議局章程實相表裏卽爲將來上下議院法之始基所擬尙屬周妥著京外各衙門一體遵行其各項細則章程仍著迅速籌擬奏請宣布餘依議單併發欽此 七月初八日

上諭振興實業爲國家富強要政迭經諭令各直省督撫實力提倡並簡派大臣前赴各國賽會藉以開通商智爲改良競進之圖我國地大物博誠非薈萃觀摩不足以造精進茲據農工商部會奏議覆南洋籌設勸業會及賽物免稅一摺兩江風氣早開民物繁盛自應就地設會樹各省之模型著派南洋大臣兩江總督張人駿爲該會正會長並著各督撫籌辦協會出品各事所有賽品准其分別豁免稅釐俟開會有期屆時由農工商部奏請簡派大臣爲審查總長蒞場開會用示朝廷勸勵農工推廣商業之至意欽此 七月十三日

上諭翰林院侍讀學士惲毓鼎奏直省倉穀有名無實請飭實行儲積以備凶荒一摺地方建倉積穀實爲備荒要政自應認真稽核蕩除積弊如該侍讀學士所奏殊屬

有名無實著直省各督撫將豫備各倉切實稽查整頓勿使稍有弊竇並責成地方官督率紳衿悉心經理務期循名覈實庶足以防凶荒而植元氣欽此

七月二十二日

大清宣統新法令第七冊

●軍機處奏 實錄館咨取摺件檔冊酌定收發章程摺

查軍機處逐日錄出清漢摺報及所奉清漢 諭旨檔冊等均收存 方略館大庫備查每屆恭修 實錄由該館隨時咨領敬謹編輯後陸續繳回歷經辦理在案本年二月奉 旨纂修 德宗景皇帝實錄據該館咨稱同治十三年十二月初五日起各項書籍卽陸續檢齊以備咨取等因前來伏思 德宗景皇帝御極三十四年變法圖強維新政治所奉 諭旨尤多綜計錄存各件及一切檔冊卷頁紛繁軍機處與 實錄館互相交涉稍不詳慎難保無遺失短缺之虞自應安定章程以嚴收發而昭周密臣等公同商酌此次 實錄館咨取時擬先飭軍機章京等將錄出摺奏每日若干件檔冊每本若干篇另立一冊開載細數照數點交承領之人接收清楚應令畫押再行領去將來繳回時仍由該軍機章京等照數點收如有短少卽咨由 實錄館查明補繳以專責成 臣世續 臣張之洞 臣那桐均蒙 恩簡派 實錄館差使應如何督飭該館提調等官嚴定規條各專經手之責期無遺失短缺之處當與各總裁判官悉心會商妥籌辦理謹奏宣統元年七月初一日奉 旨依議欽此

●東三省總督錫良吉林巡撫陳昭常奏吉省創設行政會議處摺

竊維立憲首判三權而惟行政一端其事務爲最繁其範圍爲最廣故非統籌全局不足以收提綱挈領之功非博採羣言不足以期集思廣益之效今我國家振興庶政百度維新九年立憲之詔既頒三權分峙之基已立舉凡立法司法行政各事皆須依限籌備逐漸推行各直省轄境遼廓政務殷繁督撫衙門實爲一省之最高官廳凡百政令儻非先事研究率爾施行罔知所嚮其不愆而敗者蓋亦鮮矣臣等用是體察情形竊以法政二者名義雖分然必互相聯絡其用乃宏若使畸輕畸重各不相謀則渙散睽離其弊何可殫述今者諮議局將次成立固已建設一省之立法機關則凡該局提議各事及議決後執行各件條理萬端鉅細畢綜使於行政官廳無一議事機關以爲審擇權衡之樞紐則推行何能悉當查奏定官制第六條各省督撫應於本署設會議廳傳集司道以下各官會議緊要事件決定施行如有關地方之事亦可由官酌擇公正鄉紳與議是本行政會議而復參有立法性質者也今年諮議局成立之後立法別樹機關鄉紳已有與聞政事之地則此會議廳即可專爲行政而設今昔情形既有不同自不能不少事變通以蘄適當嘗考東西各國現行制度凡一議事會成立必有一參事會以執行之雖其組織之人員不同權限之廣狹互異要其互相維繫互相監督不至失其議決執行之作用者則一也今擬略師其意卽於吉林行省公署立一行政會議處分設正副兩項議員以現任司道及旗務蒙務處總理充正議員以嫻習

法政富於經驗之人員充副議員而臣等爲之議長凡本省行政重要事件諮議局議決執行事件及應宣付諮議局籌議各種議案概交該處開會集議約分最要次要尋常三等最要者開全體會議次要者先交副議員決議後交正議員復議尋常者則交副議員會議循事實之輕重緩急以定會議之序必使一省政治悉臻完善立法行政各得其宜而憲政之前途乃可日有進步況查中國一省面積之廣每足敵他人一國而有餘凡內政外交度支兵備實業各端無不分設專官以司其事論厥大勢實無異於德意志聯邦各國之一政府彼德意志聯邦各國無不各有議會即無不各有內閣會議今各直省既均設諮議局以爲立法機關即應於各直省最高官廳之內設立行政會議現在各省以設立行政會議請者僅直隸江蘇兩省然或謹守舊定官制或專重籌備事宜似於行政制度仍有所偏而未盡協自非遵照籌備憲政宗旨斟酌新建省治情形創定章程妥爲辦理不足以收政治統一之效謹奏宣統元年七月初一日奉 硃批該衙門知道欽此

按此摺已由憲政編查館電飭各省一律仿辦

●湖廣總督陳夔龍湖南巡撫岑春煊奏酌裁湘省綠營將備移併汛防摺併清單竊維綠營制兵迭奉 諭旨裁汰湖北湖南兩省經升任督臣張之洞奏准分年裁汰歷經咨行照辦在案伏查原奏章程兵丁既逐年裁減其各鎮協營員弁亦應視裁兵

之若干成數酌量裁缺以肅戎政而符定章近年度支浩繁軍餉日形支絀久應照章辦理惟歷年以來匪氛未靖地方警察尙待推行綠營雖不足恃究爲數百年額設之汛防且軍興以後歸標候補者實繁有徒一旦驟裁多缺其舊時立功積勞人員更無補署之期情亦可憫似不得不略事變通臣夔龍先將鄂省各營將備並千把外額各員弁酌裁三分以上業經分別奏咨欽奉諭旨轉飭欽遵各在案臣等查湘省各營將備事同一律除鎮筵綏靖乾州永綏保靖鎮溪河溪古丈坪等鎮協營已奏請酌留毋庸議裁外其餘尙有副將七缺內常德協副將寶慶協副將永順協副將三缺參將七缺內岳州營參將澧州營參將臨武營參將桂陽營參將宜章營參將五缺游擊十缺內撫標右營游擊提標右營游擊永州鎮標左營游擊武岡營游擊四缺都司十一缺內提標後營都司沅州協中軍都司靖州協中軍都司三缺守備二十三缺內撫標右營中軍守備提標左營中軍守備綏甯營中軍守備石州城守營守備嶺東營守備五缺或同城營數較多或經管汛防糧餉較簡皆可一律裁去以省浮冗其各營兵丁亦仍照章分年裁汰凡係現存之兵丁如裁去副將者其兵馬糧餉卽歸該中軍都司管理如裁去參將游擊及專閫都司者其兵馬糧餉卽歸該中軍守備或千總管轄如仍留營官而裁去其中軍官者其兵馬糧餉卽歸該領哨千總管理或卽由該營官自行經理至於巡哨彈壓安輯地方仍責成現存各營員悉心經理並嚴飭各路巡防

隊遇地方有事各按所管汛地就近調營彈壓平時則按照定章隨時協同各營汛認真巡緝以期周密總期額缺雖已裁撤而責任仍屬有歸所有此次被裁人員擬皆援照鄂省裁缺辦法酌量人材敘補委用如並無差委均仍留廉俸三年以示體恤其署事人員亦照鄂例給予兩季半廉以作旋省旅費除千總把總外委額外各缺另行咨部核定外據湖南布政使莊賡良提學使吳慶坻按察使陸鍾琦兵備處總辦候補道吳曜金會同具詳請 奏前來 臣等往復咨商意見相同除咨度支陸軍部查照外謹奏宣統元年七月初一日奉 硃批該部知道單併發欽此

計開

擬裁副將三缺

常德協副將

該協現在裁存兵丁一百二名該副將與提督同住一城足資捍衛

該協所存弁兵卽由都司專管

寶慶協副將

該協現在裁存兵丁一百一名兵既無多照章在應裁之列應仍留

都司以資鎮定

永順協副將

該協現在裁存兵丁二百七十六名汛地並不寬闊與古丈廳保靖

縣緊鄰可期兼顧其標兵卽責成都司專管

擬裁參將五缺

岳州營參將

該營現僅存兵丁七十七名卽責成守備管轄

澧州營參將

該營現在裁存兵丁九十三名卽責成守備管轄

臨武營參將

該營現在裁存兵丁七十三名查藍山汛有守備把總同城擬請將

藍山汛守備調駐臨武縣城以資巡緝

桂陽營參將

該營現在裁存兵丁六十四名卽責成守備管轄

宜章營參將

該營現在裁存兵丁八十名卽責成守備管轄

擬裁游擊四缺

撫標右營游擊

查左右營現存兵丁二百六十名有參將足資巡緝其弁兵卽責

成參將管轄

提標右營游擊

該游擊與提督同城提標既有參將營弁較多足資巡緝弁兵卽

歸併參將管理

永州鎮標左營游擊

該營所存兵丁無多卽責成左營守備接管

武岡營游擊

該營現在裁存兵丁八十名查城步縣汛有守備把總同駐一城擬

請將城步縣汛守備調駐武岡以資鎮定

擬裁都司三缺

提標後營都司 該都司與左營游擊及辰州城守營都司均駐辰州府城營弁較多足資巡緝所存弁兵卽歸併左營游擊管理

沅州協都司

該都司與副將同城有副將足資巡緝

靖州協都司

該都司與副將同城有副將足資巡緝

擬裁守備五缺

撫標右營守備

查右營游擊已擬裁缺右營守備亦可裁所存弁兵卽撥歸左營

管轄

提標左營守備

該守備駐紮浦市存兵無多卽責成左營游擊管轄

綏甯營守備

該守備駐紮臨口現非扼要存兵亦已無多卽撥歸游擊管轄

辰州城守營守備

該守備駐紮金廠並非扼要存兵無多卽併歸城守營都司管

轄

嶺東營守備

該營現在裁存兵丁三十六名卽責成把總外委分管

以上共二十缺均請一律裁撤合併陳明

●東三省總督錫良吉林巡撫陳昭常奏籌辦吉省添改各缺情形並遴員試署道

缺摺

竊本年閏二月升任督臣徐世昌與臣昭常奏請援照江省成案添改民官酌裁旗缺

大清宣統元年
一摺蒙

飭會議政務處王大臣等議准覆奏奉

旨依議欽此欽遵刷印原奏咨行

前來臣錫良巡視到吉與臣昭常詳加商榷竊以吉省幅員遼闊設官守土允宜首重邊防此次奏請添改道府廳州縣各缺大小共計二十餘處本係統籌全局而言自應分別緩急次第籌辦財力庶無竭蹶之虞現經臣等一再考察擬除寶清舒蘭阿城勃利饒河一州四縣已於原奏聲明暫行緩設外其餘添改各缺約可分爲三等一升改之缺如五常府雙城府賓州府綏芬府延吉府臨江府伊通直隸州榆樹直隸廳皆以舊缺升改地方開闢已久一切具有規模自應依照原奏卽行揀員請補一分設之缺如琿春廳撫民同知東甯廳撫民通判和龍縣穆陵縣富錦縣等缺或以佐缺升改或由舊治分防民多寄居未臻富庶事皆草創尙費經營擬先派員試署俟有成績再行奏請實授一新設之缺如綏遠州汪清縣額穆縣樺川縣等缺類皆荒僻之區田廬城郭胥待綢繆度地居民尙需時日則擬先派設治委員前往設治俟一二年後地方繁興再由臣等體察情形分別補署以昭核實其臨湖一缺原奏擬治興凱湖西北岸本爲邊防起見但查該處瀕湖一帶地多沙礫不利耕植居民尤爲寥落設治於此頗多不便擬暫從緩設另於蜜山府屬呢嗎口地方設一分防同知以資鎮攝該處居民頗衆且爲邊界要衝必設專官鎮撫其間庶可無患而於形勢亦覺較爲完善以上各節均就目前籌畫情形略爲次序此外未盡事宜統容臣等陸續會商隨時奏咨辦理其

所有未經改定各缺均令各循其舊暫勿更動免滋紊亂此吉省奏准添改各缺籌辦情形之大概也而其最關緊要不容稍緩者則爲東南路東北路兩道缺也查東南路道一缺原奏駐於琿春所起區域南起延吉東北迄綏芬沿邊綿長二千餘里地方極爲重要東北路道一缺原奏駐於三姓卽今依蘭府治內政外交均關緊要且兼依蘭臨江等處關稅事宜均係邊疆要缺前者各設副都統一員駐防該處現既奏裁改爲道缺自應卽速遴員試署以重職守而免曠誤茲查有現署琿春副都統留奉補用道郭宗熙品端學優才長心細由翰林院庶吉士改官道員經升任督臣徐世昌等奏署是缺到任經年辦理悉臻妥協且於邊塞情形已稱熟悉以之試署琿春東南路道員缺洵堪勝任又開復原官留奉補用知府王瑚守潔才優堪膺艱鉅由翰林院庶吉士改歸外用歷任川粵各地方所至有聲嗣以署理廣東廉欽道因屬縣失陷部議革職經臣錫良奏調來東以才堪大用奏請開復奉 旨著照所請欽此近委查蜜山三姓一帶墾務事件調查極爲明晰以之試署依蘭東北路道洵屬用當其才雖王瑚一員以知府試署道缺於例稍有未符但係先行試署自與卽時請補不同合無仰懇 天恩俯念邊省人才缺乏卽以該員郭宗熙試署琿春東南路道王瑚試署依蘭東北路道出自 逾格鴻施並俟各該員等到任以後果於地方辦有成效再行奏請補授謹奏宣統元年七月初二日奉 硃批著照所請該部知道欽此

●度支部會奏併案議覆護滇督東督奏請將鴉片煙縮期禁種摺

宣統元年六月二十五日軍機處交出護理雲貴總督沈秉堃電奏一件奉 旨沈秉堃電奏請飭黔蜀陝甘山西五省統限本年一律將鴉片煙禁種等語著該衙門速議具奏欽此又六月二十六日軍機處交出東三省總督錫良奏部議禁煙年限太寬懇請一律縮期禁種一摺奉 硃批著該衙門歸入沈秉堃電奏一併速議具奏欽此先後抄交前來查雲貴總督原電奏內稱鴉片流毒已久 朝廷嚴旨飭禁原限十年遞減前總督錫良以期限太長易於生玩玩則終於難禁因毅然奏請縮限一年禁盡其時接壤黔蜀邊民一旦失此大利皆藉口於鄰省未禁抗種偷種均所難免遂多派員弁演說白話告示令其知種煙爲害發給各項子種使其知抵補之有方本年春間全省八十餘廳州縣居然一律淨盡實非初料所及前閱黔撫龐鴻書奏疏稱黔省今年秋後不至再行種煙聞川督趙爾巽籌禁亦均不遺餘力似此情形接壤之區秋後無虞再種乃昨准度支部咨會同禁煙王大臣外務部議覆兩江遵辦禁煙各節並籌擬情形一摺內有陝甘黔蜀四省限至宣統五年一律禁淨等語在部中係就各省督撫原奏情形酌中定限不知黔蜀鑒於滇省之縮限禁淨刻正實行本年一律禁絕今部文准其展限五年則黔蜀人民必不遵本年不種之命令籌思再四焦灼莫名此禁彼裁影響實大惟有請 旨電飭黔蜀陝甘山西五省督撫統限本年一律禁盡以歸畫